

懷安漢夷輿地元魏時  
為懷荒巨鎮歷耶律金  
元稱北方雄要明時設  
重臣建鄴宣雲地居兩  
鎮之交偉績豐功被斯  
土者尤盛顧壤居邊塞

倍尚武功士之懷鉛握  
槩者罕所託迹而服官  
蒞政者又以壇塲事殷  
無暇為編摩訂削之業  
致令舊聞不彰往事湮  
忽可惜也間嘗行部經

循其地觸目新眺雲頭  
白腰諸峯蒼翠如列几  
案洋河一水混混而東  
竊歎山川靈秘會有時  
而發而猥以才弱未克  
網羅放失勒為一書以

備輶軒職志用是耿耿  
非一日矣歷下楊君宰  
是邑之三年政修人和  
始有事於撝葺乃於陳  
編蠹蝕之餘得舊人殘  
冊黯湮踳駁利斷橫決

君延名宿相與商略異  
同伴繫而寸度之更益  
以其所未備事取其覈  
實者辭汰其複重者凡  
三閱月書成計若干卷  
於是而一方之掌故犁

然備焉君於茲役可謂  
無負職業矣古之良吏  
其爲治也必先知其習  
俗之所尚風土之所寓  
以及昔人得失之所存  
而後歸之於政無偏倚

違反之弊邑乘者亦學  
古入官之距墨也逸詩  
云周道挺挺我心扃扃  
講事不令集人來定夫  
講事也而集人以定君  
子躔之矧其援古以証

今且信今即以貽後其  
為功也不益愈乎此邑  
志之所以不可不作也  
雖然有為君慶者昔鄴  
元水經一注析於北而  
洧於南程大昌作雍錄

徃徃多傳聞之悞識者  
不無遺議君幸值

大平盛世牽絲邊邑簿書  
之暇從容諮訪其論撰  
皆履轍所經無耳食之  
悞使後之讀君書者快

然無憾則君亦可以無  
憾也而余於披對之下  
亦有籍以慰夙昔未酬  
之願其樂觀厥成又何  
如也是為序  
乾隆六年歲次辛酉冬

十月中澣分守口北道  
按察使司僉事錢塘金

志章



序

古者列國皆有史官掌記時事郡縣而後史惟職之朝廷四方時事輜軒採之稍有遺逸則亦無所參稽守土者間慮及此廼仿周官土訓道訓遺意各以其所覩記志於其書以守一方之籍以備輜軒之採蓋志亦綦重矣哉懷安故幽朔地上世邱索我芻前明始設衛所隸京師

國朝康熙三十二年廼改置爲縣然百十年來政令掌之官司賦粟籍之輿編土俗見之風謠文章禮樂傳之遺族故家凡在直省爲統志爲省志爲郡志邑志

懷安縣志

序

一

莫不朝有成書野有定本獨懷邑之志闕焉未詳已未之歲余自龍門量移茲邑慨念是爲邑所當務會政之未間嘗與邑士夫咨嗟往復久之乃獲周生昇所藏前宰殷氏志藁於故牘中又獲晉陽武氏續藁後先展閱亦約畧有可表見然皆惜以未訂梓去其所遺藁日久漸且舛訛也越歲辛酉郡太守王公檄下州縣纂修志乘適余數以是請旣奉檄欣然爲其所得爲遂延聘錢塘孝廉集軒錢君開局縣署西偏發篋陳書網羅放失舊聞始就殷武二稿講去其非而求其是又本之列代史叅諸鎮志叅諸通志叅諸



隣郡邑志綜覈紛紜務在徵疑考信斷以義例約爲二十四卷凡四閱晦朔而書以成於戲天下事志之非難志之而無可志之難也夫人於著作之林書不能以盡信輒自捃摭動易支離轆轤又况并此不能盡信之書渺不可得僅於零文斷簡竊取一二漫漶徵之編年別錄異地襍傳斤斤爲之補綴爲之雕鏤如是而欲訂其繆盭擇之精而語之詳豈不難哉豈不難哉然而焚膏矻矻不敢憚勞舉夫政令之掌賦粟之籍風謠之紀文章禮樂之傳所爲百十年來闕焉未詳者亦幾幾乎可以守一方之籍備國史之採

矣而獨有所重念焉者懷雖邊境近京師乃五百里教化易究昔文翁刺蜀澤以詩書偃宰武城治以絃歌使密邇

畿輔顧且仍安朴僿詩書之澤不長絃歌之治未洽抑或囂凌愚惛以煩教訓也可乎哉方今

聖天子蒸蒸禮樂疊沛文思遍於海隅日出罔不率俾屬在親炙之地爲合者方當與斯士斯民共遊於涵育薰陶之內鼓舞文明之化以庶幾仰副中天之治於萬一則於斯志之作蓋不禁三致意焉若夫筆墨鉛槧之煩則固自知身爲其難聊以爲後此者之嚆矢

云爾是爲序

乾隆六年歲次辛酉夏六月下浣之吉懷安縣知縣

濟南楊大崑玉峰氏題



懷安縣志

序

三

楊公德政誌

楊公諱大崑字玉峰山東濟南歷城世胄也歷任龍門豐潤卓卓有循良聲乾隆己未歲夏四月蒞臨茲土甫下車虛懷若谷周諮民隱凡害之當去利之當與者無不次第舉行懷邑舊有水患縣城與柴西最熾公相度形勢築隄疏河水患以息語云微禹吾其爲魚其此之謂乎修葺

聖廟敬一亭及敬一書院建立左衛養正書院俱資膏火以課讀辟雖鐘鼓之化於今再見也懷曩未編保甲公力行之晝夜嚴稽農安於野商安於市矣且矢志

懷安縣志

序

一

勤慎案無留牘吏不得舞文胥無由生詐四境之內胥沐浴於光天化日之中其折獄也惟公則明惟明則斷無事煩言而民自不寃勝者不勝者咸曰神明宰也循行阡陌補助兼行修築橋梁徒與並濟被災者請貸以恤之流亡者捐棺以殯之設粥賑饑待火不止於五百施藥療疾良劑普濟乎萬生噫溺由已溺饑由已饑念切民瘼痼瘵在抱古聖王之下車而泣息及枯骨者胥是意也今又纂集志乘備載疆里山川搜羅古今人物從前未有之美自此而始公欲彰善以勸善必等豈忍掩公之善於不彰乎困

期列諸名宦永垂不朽 公以職分宜然未允所請  
而邑人誌感之私率不容已故不揣荒陋畧爲紀述  
以俟來茲之續志者

丙子科舉人原任浙江紹興府嵊縣知縣邑人張泌

等公誌



懷安縣志

序

二

纂修懷邑志序

辛酉之歲懷邑侯楊君介上谷太守王先生招余燕  
邸先是王先生與余叔學使者香樹先生約將延余  
長書院士不果行至是乃以其郡邑志相屬而楊侯  
亟以聘來不獲辭迺廼橐筆蒞事余惟志史類也夫人  
作一代之史必具有一代之識然後是非明而褒貶  
定作一邑之志必萃有一邑之觀然後得以徵往事  
而思來者古之學者載籍極博猶考信於六藝蓋不  
敢苟於著作若斯也以余弁鄙旣齷齷無文而懷介  
邊邑自明以來因循且數百載掌故迄無可考康熙

四十六年前邑宰殷氏稍稍撰叙又未經訂是其所  
存藁日漸零軼其傳聞劉呂之誤益以匪鮮其後此  
著述終已無聞則所謂一邑之觀於何萃矣余自二  
月杪來志局早夜與楊侯考訂惟恐忘已事之已拙  
而又不敢苟且云爾也迺悉意網羅遺書於諸聞見  
必本諸府志以求其合必參諸省志以觀其通必要  
諸歷代史傳以徵信而考疑每一藁出與楊侯參互  
往復然後付鈔胥凡四閱月三易藁而志成昔宋熙  
寧中有常州守召對至京師問以錫山遠近其人無  
以應神宗謂其爲守臣而不知境內山川則其爲政

可知朱文公涖南康甫至輒問郡志君子謂其知所  
當務侯之爲志不獨紀其山川舉夫一邑之徵往而  
思來者一一具見觀於此其侯之政之次第節目今  
日徵之於邑異日以炳史冊卽斯可觀矣侯誠知所  
先務者哉侯名大崑字玉峰嘗合龍門其惠政一如  
在懷時太守王公名者輔字近顏清勤率屬盤錯益  
堅侯之介於太守以屬筆於余蓋亦可觀相與之致  
也已志凡二十四卷鏤版藏諸邑齋

乾隆六年辛酉季夏錢塘錢戢曾拜序

凡例

一懷邑故無志乘康熙四十五年縣令三韓殷氏始爲勅彙晉陽武氏續之二稿俱未付刊日久漸軼茲彙加參訂考信補亡殊費蒐討覽者量其不逮焉

一舊志稿爲綱十四分目九十標舉太瑣茲約爲二十四卷不復繁稱而舊志綱目畢包其中

一星野從宣府志屬尾歷代罔有異同舊志稿兼列昴宿未知昉於何書或者以備占驗聊仍兩存

一沿革按明孫太史宣鎮志統舉一郡大畧于懷邑

懷安縣志

凡例

一未經條析舊志稿抄襲多誤茲本孫志折衷於遼金元三史詳加參考雖未敢云悉備然于古今建革粗覺犁然

一疆域沿邊各界舊志目爲外地按之皆治所轄則皆疆域內也因稽其道里附焉俾知幅幘所屆邊封尤重正不當域外置之矣

一山川舊志僅列其名今採宣鎮志畿輔通志逐一增注疏其原委支派間及一二形勝登臨者知所適從開卷者可當卧遊也

一城池創始重修必書重保障慎封守也墩堡橋梁

地險所寄準以附入

一公署舊志率多缺載今詳其方隅稽其修建倉庫場局依次彙登坊宇營房緣類附入卽舊署建廢不一亦並覩縷俾溯厥經營惕然官邑之庇身知而慎之矣

一學校師道所關典禮特隆他志列學宮入祠廟非尊師體今改登學校俾知萬世師表非常祀所得而同又詳其器數使不闕於俎豆至名宦鄉賢雖或輓近不無緣飾然餼羊猶存亦可顧名思義並臚其姓氏稱斯祀者安然享之其不稱斯祀者自

懷安縣志

凡例

二

怒然其不安也

一戶口田賦依照賦役全書載自順治年始前代故籍無徵不復備及其代徵雜稅積貯則準田賦附焉戶口已均入田賦而仍分舉者民數至重故另卷云

一武備邊方特重 本朝量地設兵因革不一舊志缺漏殊甚今悉按現在經制分條序列而以裁復舊制附注於下并類紀明制以備參攷

一驛站舊志未詳懷邑當雲谷要衝內達京郵外通邊貢供億恒慮不時節年增設夫馬幸無掣肘故

特列一卷而以協濟諸額附焉

一 祀典舊志於秩祀神祇頗畧而琳宮梵宇較詳茲按祀典列載首壇壇次廟祀次附寺觀一二以存舊制而諸淫祀槩從汰焉

一 古蹟舊志惟懷安故城九王城二者而已今考宣鎮志畿輔通志可採者增入間有一二傳聞亦必徵諸典故無稽者必汰不敢傳會以滋考古者疑也

一 職官自嘉靖宣鎮志後記載無傳卽本朝未改縣之前亦復故牒散佚舊志彙已未遑備考况今

更越歷年遍加稽訪稍稍得其什一分類次表並及裁官以備掌故其已佚而無可考者亦付之無如何矣選舉準此

一 名宦未必皆賢然人才難得其間有就一節取者汗諸簡端以勸將來人物準此

一 人物論定始書其生存者例不得錄故如左衛舉報孝子劉恒李天珍周德恩行雖可採未定厥終不敢遽入以紊史例謹識其姓名如幅以俟續志者錄焉

一 列女採據宣志舊志其地堡舉報必細行體訪內

有其人現存而已邀旌典者有未邀旌典而守志  
與年例相符者無論已旌未旌但合年例皆得備  
書庶幾窮谷松心不與草木同腐矣

一藝文以輔志所未逮取其互相發明故有關於山  
川風土人物政教事功者文雖質必錄其誇多闕  
靡而於掌故無涉則寧從闕云